

## Recordando Sr. Rufo Wever

(Skirbi pa Dufi Kock)



Awe, dia 8 di december 2017, ta bon pa nos recorda cu 100 aña pasa nos Pionero di e Musica y Cultura Moderno di Aruba, Sr. Rufo Wever a nace. Alabes el a compone hunto cu Padu Lampe nos Himno, "Aruba Dushi Tera".

Dia 8 di december 1917, a nace na Wilhelminastraat 33, Oranjestad, Aruba, Sr. Rufo Inocencio Wever, for di matrimonio di Sr. Civiles Marcial Wever Everts y Sra. Leonila Maria Annette Lampe Babijn. E tabata ruman mayor di su cuatro rumannan. El a atende Mulo na St. Dominicus College na Oranjestad.

Rufo su carera musical a cuminsa na edad di cinco aña ora el a cuminsa toca cantica popular cu su sinfonia di boca cu su mayornan a regalé. Su tata cu tabata un musico, a descubri e talento musical di su yiu di e manera cu e tabata toca e canticanan. E tata a compra un piano segunda mano pe y tabata muestra hopi agradabel tocando e piano. E tata cu tabata impresiona cu su talento, no a vacila y a hiba Rufo cerca e conocido docente Curasoleño di e tempo ey, Shon Chichi Rodriguez Timmer. Rufo tabatin 6 aña. Sra. Rodriguez a cuminsa siña Rufo e conocimiento basico di musica. E tabata practica constantemente riba e piano y ya cu su 12 aña e por a toca piezanan musical na un manera admirabel. Ademas di e piano, Rufo a cuminsa siña su mes toca mas instrumento musical, manera saxofon, guitarra, cuarta, clarinet y varios instrumento ritmico.



Cu 13 aña Rufo a actua pa prome biaha pafo di Aruba. El a bay Corsou, caminda el a causa furor. Un aña despues el a biaha pa Boneiro unda el a conkista hopi admirador. Tempo e tabatin 15 aña el a lanta e orkesta "The Melody Band" cu su amigonan. E orkesta a bira un exito grandi na Aruba y tabata toca na clubnan y cinemanan.

Na aña 1935 e famoso cantante Argentina, Carlos



Gardel, a bishita Aruba y Rufo a toca cuné tambe. Inspira pa e cantante aki Rufo a lanta su grupo di tango "Los Trovadores Musicales". Esaki tabata e prome conhunto Arubano cu a toca na Radio Curom na Corsou.

Rufo tabata un musico, compositor y areglista conoci cu a toca y skirbi hopi cantica. Su walsnan ta hopi conoci na Aruba. El a compone tumba, bolero, zamba, mambo, porro, merengue, danza, mazurka, polka y calypso. El a skirbi e wals "Arubanita" ora e tabatin 15 aña. Esaki tabata e prome wals cu Su Mahestad Reina Juliana a baila na Aruba na aña 1955. Despues di "Arubanita", Rufo a compone tres piesa di wals, "La Encantadora". E ultimo aki tabata un di e favoritonan di Aruba y Antiyas Hulandes. Su wals "Aruba" tabata e prome wals cu el a toca na Corsou. Mescos cu "Annette" cu el a dedica na su mama. Facilmente e por a compone y toca. El a traha mas di 400 composicion. El a traha tambe hunto cu Padu Lampe y Lio Booi, cu a yuda skirbi e cantica tambe.



Den varios composicion Rufo a honra su patria. El a compone por ehempel "Mi Aruba Stima", "Aruba", "Brisas di Aruba", "Aruba Tiera Bunita", "Mambo di Aruba". "Aruba Dushi Tera" el a compone hunto cu su amigo Padu Lampe. Dia 18 di maart 1976 Gobierno di Aruba a proclama "Aruba Dushi Tera" como himno nacional di Aruba.

Durante su bida Rufo a produci mas o menso 400 composicion den diferente ritmoi manera wals, tumba, bolero, samba, mambo, porro, merengue, danza, polka y mazurka. Ademas di compositor e tabata tambe areglista.

Na aña 1934 Rufo Wever a cuminsa pone piesa riba caha di orgel. Antes piesanan tabata wordo poni pa Aruba pa un tal Sr. Sprock y tres otro mas na Corsou. Awe ta Aruba ta pone nan pa Antiyas. (Potret di Rufo y su ruman muhe Libia tempo Rufo tabatin 17 aña.)



Na aña 1938 Rufo, cu su 21 aña a cuminsa cu e trabou di cah'i orgel. E tabata e prome persona cu a cuminsa traha cilindronan pa cah'i orgel na

Aruba y el a haci esaki pa 33 aña. E tabata ocupa cu su caha di orgel. E tempo aya e Arubianonan tabata bay cu nan caha di orgel Corsou cu boto comosifuera nan tabata kibra. Den curso di tempo, Rufo a haya sa con pa repara su caha di orgel di e tempo ey y hopi hende tabata acerca Rufo pa drecha nan caha.

Na aña 1941, Rufo, cu 24 aña di edad, den un accidente di auto ta perde su man robes. Apesar di e tragedia aki, den su bida el a supera esaki. El a keda compone. Esaki no a pone stop cu su pasion musical, el a cuminsa practica cu su man drechi di tal manera cu tabata parce cu e tabatin ainda su dos mannan. Cu yudansa di un man artificial, cu e mes a diseña, Rufo a cuminsa toca atrobe. Prome cu el a laga traha un man na Alemania, despues e mes a traha uno. El a adapta su estilo di toca remarcablemente. Cu su man drechi e tabata toca e tema y parti e ritmo, cu su man robes e tabata reforsa e harmonia tocando e tononan di bas.

Cu yudansa financiero di Sticusa, Rufo a publica 15 piesa di piano. El a graba diferente disco y a presenta na radio y television. Tambe e tabatin su mesun show, "Atracciones Rufo Wever".

Na aña 1953 Arubaanse Muziekschool a wordo lanta. Despues nan a duné e honor na Rufo Wever y a yamá Scol di Musica Rufo Wever. E scol aki a haña su prome director den persona di Sr. Arie Luois Born, un musico y docente di piano, canto coral y teoria. Lesnan a cuminsa na cas di Sr. Y Sra. Born na Mozartstraat 3, Oranjestad, cu les di piano, fio, canto y teoria. Pronto a sigui lesnan na San Nicolas y na Bungalow di Sra. Odis S. Mingus, Presidente di Lago. Na final di 1955, Sra. Born a bandona Aruba y Sr. P.N.J. Treijtel a tuma over temporalmente. Na Augustus 1956, di dos director tabata den persona di Sr. Rien Hasselaar.

Diabierna, dia 6 di maart 1964, e genio musical. Rufo a haci su debut dilanti di canal 12 di Teleraruba. Despues di un ausencia di basta aña pueblo lo por mira e genio cu ta toca piano "cu un solo man". Esaki lo ta entre 7:45 pa 8:15 tur diabierna anochi pa un temporada largo. No tabatin duda cu Rufo lo a causa un sensacion como cu hopi cu a yega di scucha su musica pero nunca a presencié personalmente, a haya e oportunidad amplio pa admiré y puntra nan mes "ta di con e por?" No tin duda cu un di e balornan mas grandi cu Aruba a yega di produci, como un isla asina chikito, ta e gran musico Rufo Wever den e berdadero sentido di palabra, no obstante su handicap.

Durante augustus 1964, "Rufo Wever, Pianista Con Brazo Artificial" tabata titulo di e prome long-play cu Rufo a graba na Caracas, Venezuela. E disco

aki ta contene ritmonan Antiyano manera "Aruba", "Gór Bati pa mi Bay", "Tilingo" y otronan. Durante su estadia, Rufo a haya oferta pa den futuro regresa pa toca y graba disconan, entre otro pa e Club de Leones de Maracaibo. Muy probable cu lo por miré den Show di Renny Otolina tambe.



Durante un manifestacion den stadion di Wilhelmina na Dakota, dia 18 di maart 1976, Himno y Bandera di Aruba a keda instala. Mientras cu tabata hisa e bandera pa prome biaha, e coro di Sra. Maybeline Arends-Croes, riba acompañaemento di e orkesta filharmonica di Aruba bou guia di e musico Sr. Joy Kock, a canta e composicion, un wals di Padu Lampe y Rufo Wever "Aruba

Dushi Tera" como e himno Arubano. Pueblo di Aruba tabata masalmente presente pa duna e himno y bandera nan honor.

E himno di Aruba "Aruba Dushi Tera" skirbi na aña 1950 door di Juan Chabaya (Padu) Lampe cu su composicion di Rufo Wever. E coro di Trupialen a graba e cantica na aña 1954 y "Aruba Dushi Tera" a sigui resona durante tur evento oficial. Sr. Hubert (Lio) Booi a skirbi un couplet adicional na 1976. E cantica a bira asina popular bou di e pueblo cu riba 18 di Maart 1952 a introduci "Aruba Dushi Tera" como himno nacional di Aruba.



E di tres couplet a ser agrega riba Sr. Betico Croes, e tata di Aruba, su peticion.

Na aña 1952 Juan Chabaya (Padu) Lampe y Rufo Wever a compone e cantica pa motibo di a sinti e necesidad di tin un piesa cu ta expresa e amor di e pueblo Arubano pa e isla y lanta e sentimento patriotico den cada persona cu ta biba riba e pida baranca aki.

Na aña 1975 Rufo Wever a ricibi un condecoracion "Ridder in de Orde van Oranje Nassau" for di Su Mahestad Reina Juliana.

Dia 30 di december 1977, Rufo, na edad di 60 aña, a bay laga nos, debi na un problema di salud, esta pulmonia. Aruba y Antiyas Hulandes a perde un di nan musiconan di mas grandi, e pionero di e musica y cultura moderno di Aruba. E acto di entierro a tuma luga e siguiente Dialuna, dia 2 di januari 1978 cu entierro musical.

Dia 30 di september 1998 Stichting Arubaanse Muziekschool a celebra su 45 aña di existencia. Riba e dia aki cu sumo honor y respet e stichting a duna cu orguyo su scol di musica e nomber "Scol di Musica Rufo Wever".



Tabatin un programa cu discurso di e.o. e director, presidente di directiva Sr. Elgin Juddan y Ministro di Cultura e tempo ey Sra. Dr. Lilly Beke-Martinez. E anochi aki e ministro a de vela e potret di Rufo Wever (qepd). Despues di e ceremonia e ministro a habri e exposicion,

cu a ser dedica na Arubaanse Muziekschool y Rufo Wever, den e sala di exposicion di Cas di Cultura. Rufo a bay laga nos, pero ki ora nos scucha un piesa di caha di orgel of un wals, Rufo ta keda den nos presencia spiritualmente. Cu Rufo sosega na Pas.

***Dufi Kock***

***Escritor y Historiado***

***8 di december 2017***